

Program pemadanan karyawan bagi tingkat prospek kerjaya

SATU program bimbingan baru telah diperkenalkan di Universiti Teknologi Nanyang (NTU) bertujuan membantu para pelajar meningkatkan prospek kerjaya mereka.

Dilancarkan semalam di Pameran Kerjaya NTU, program NTU Connecting Minds akan memadankan para siswazah yang telah mendaftar dengan alumni NTU yang juga pakar industri.

Mereka boleh mencari sendiri atau dipadankan dengan mentor sukarelawan dari industri pilihan mereka menerusi sebuah platform digital sehenti dengan menggunakan kecerdasan buatan (AI) dan data utama.

Pelajar yang menyertai program ini akan mengenal pasti matlamat serta pilihan kerjaya mereka dan bekerja rapat bersama mentor mereka selama tiga bulan agar dapat mencapai matlamat yang telah mereka tetapkan.

NTU berharap tahun pertama program ini dapat menarik 1,000 pelajar dan pembimbing.

Naib Presiden (akademik) dan provost NTU, Profesor Ling San berkata:

“Matlamat utama adalah untuk memberi bimbingan, memupuk dan

memberi inspirasi kepada generasi bakat baru.

“Dengan pengalaman kerjaya dan kehidupan yang luas, mentor ini dapat membimbing pelajar ke arah aspirasi kerjaya mereka, membantu mereka menjangkau ijazah dan mempertimbangkan peluang-peluang baru yang terdapat dalam persekitaran pekerjaan global.

“Dengan menggunakan rangkaian global NTU yang mempunyai lebih daripada 200,000 alumni, program NTU Connecting Minds bertujuan memberi para pelajar kami permulaan yang penting serta kelebihan untuk berjaya dalam kerjaya mereka.”

Pameran Kerjaya NTU tahun ini telah menarik sebanyak 280 majikan yang menawarkan sekitar 4,000 peluang pekerjaan dan latihan. Seramai 9,000 pelajar dijangka akan mengunjungi pameran itu setiap hari yang berlangsung semalam, 6 dan 9 Februari nanti.

Beberapa pelajar NTU juga telah berjaya mendapatkan tawaran pekerjaan sebelum mereka menamatkan pengajian, dengan ada di antara mereka yang mendapatkan pekerjaan seawal enam bulan hingga setahun sebelum tamat pengajian.